



**CL. V. Ioannis Wamesii, I. C. Celeberrimi, In Academia
Lovaniensi Antecessoris Primarii, Responsorum Sive
Consiliorum De Iure Pontificio Tomus ...**

Wamesius, Johannes

[S.l.], 1643

De Testamentis. Consilium CCCCXV.

[urn:nbn:de:hbz:466:1-98716](https://nbn-resolving.org/urn:nbn:de:hbz:466:1-98716)

huius causæ; & declarando præfatis Opponentibus nullum jus dispensationis competere; condemnando eosdem Opponentes in omnibus expensis huius litis.

De Testamentis.

S V M M A R I V M.

Legatum altari relictum.

1. Altari relictum, cui debeat.
2. Præscriptio quadragenaria requiritur adversus Ecclesiam.
3. Præscriptio quadragenaria contra Ecclesiam debet esse completa usque ad ultimum diem inclusive.
4. Præscriptio quadragenaria contra Ecclesiam per solam citationem interruptitur.

CONSILIVM CCCCXV.

DE qualitate Actoris nihil dubitandum in causa M. Guilielmi Gregorii Actoris, contra D. Nicolaum Perbeys Reum. Nam etsi Reus allegationem Actoris, quod sit & fuerit Rector Altaris SS. Antonii ac Sebastiani in Parochiali Ecclesia de Limale negaverit: est tamen ea sufficientissime probata per litteras canonicæ institutionis, & obtentæ possessionis; quarum literarum auctoritatem, ac veritatem Reus tandem agnovit: ita ut bene sit stabilitum primum fundamentum intentionis partis agentis petendi quatuor modios testamenti quondam D. Georgii Deylleren relictos, pro una missa hebdomadali celebranda in dicto Altari S. Antonii; * & contra improbabili oppositio Rei, dum ex capite Pastoris dictæ Ecclesiæ (cujus vicarium agere se dicit) contendit facultatem celebrandi huiusmodi missam, ac percipiendi dictos quatuor modios ad se pertinere, qui prædicto altari relictæ sunt, hoc est intuitu dicti altaris: quia nomen illius proprium expressum est, *argum. l. si communis De stipul. servor. & causa legati, non nuda demonstratio est, sed altari coheret, l. cum tale §. falsa De condit. & demonstr. quia missam ibidem pro anima testatoris celebrari mandatum est. Quamvis enim dum altari, quod est in Ecclesia, aliquid simpliciter legatur, emolumentum legati cedit, non Rectori altaris, sed Pastori, seu Curato Ecclesiæ, Panor. in c. 1. De success. ab intest. Petrus de Perusio in tract. de quarta Episc. c. 7. versic. quid si testator: cum tamen altare habet bona distincta ab ipsa Ecclesia, seu bonis Ecclesiæ; & cum altare in titulum perpetui beneficii erectum est, & qui altare habet in eo per Archidiaconum seu Superiorem institutus est in Rectorem, seu curatorem perpetuum altaris, Bald. cons. 196. Super eo quod quaritur nu. 3. vol. 4. relictum altari cedit in augmentum fructuum altaris: quasi altari, cum exclusione Ecclesiæ, seu Rectoris Ecclesiæ, relictum, Felin. in c. Ex parte 2. nu. 4. De re script. & in c. Dilectus nu. 3. De off. ordin. Id quod voluisse testatorem deprehenditur ex eo, quod testator paulo ante speciale legatum pro anniversario, Curato Ecclesiæ adscripserit: ita ut non sit verosimile, quod facultatem celebrandi hanc missam & percipiendi quatuor modios, eidem Curato voluerit adscribere: cum disertè altaris S. Antonii meminerit, Conf. Wamcf. Tom. II.*

& in eo hanc missam celebrari voluerit. Quod autem hoc altare sit proprium ac perpetuum titulum beneficium, constat ex instrumentis pro parte Actoris exhibitis: & quod propria ac destinata habeat bona, inde constat, quod Reus alleget hoc altare Archidiacono singulis annis rescribi ad quinque modios. Quæ fortè etiam causa fuit, cur testator alios quatuor modios adjecerit pro augmento fructuum. Quæ quidem rescriptio Actori obesse non debet: nam ea rescriptio antiquam formam retinet, quæ per novum augmentum ideo mutata seu aucta non fuit, quod Rectores dicti altaris suâ simplicitate, & juris, ac fortè etiam facti, hoc est scripti testamenti ignorantia, hanc facultatem celebrandi, & missas faciendi non exerceverint: quam Pastores, seu Vicarii, sine titulo, & contra testatoris voluntatem usurpando, non potuerunt Rectoribus huius altaris, saltem non in futurum nocere, & altari jus suum auferre; * tum quod à die conditi testamenti nondum fuerint ante institutam hanc litem lapsi 40. anni (scriptum enim est & publicatum hoc testamentum anno 1523. undecima Maii, & lis hæc cæpta mense Augusto, anno 1562.) sic ut ad implementum quadragenariæ præscriptionis novem menses defuerint: quâ quadragenariæ præscriptione opus est, ad excludendam Ecclesiam à prosecutione juris, vel rei suæ; non tantum si privatus contra Ecclesiam, verum etiam si Ecclesia contra Ecclesiam præscribat, c. De quarta, c. Ad aures De præscript. Franc. Balbus de præscript. quintæ partis princip. part. 1. in princ. * Quam quadragenariam præscriptionem oportet usque ad ultimam diem ex toto esse completam; sic ut nec ultima dies accepta pro completa habeatur; quia odiosa est, Gloss. in l. In usucapionibus De diver. & temp. præscript. & in l. 3. §. minorem De minorib. * quam propterea sufficit etiam per solam citationem interrupti, quoties ab initio sine titulo aut mala fide cæpta fuit, l. Cum notissimi in princ. & §. imò C. De præscript. 30. vel 40. annor. Ius. in l. fin. in princ. De eo per quem fac. erit, Bald. cons. 211. Casus talis si interfuerit vol. 1. Cum alioqui in subiecto casu non constet, quo tempore testator mortuus sit, & quamdiu, seu à quo tempore Pastores de Limale hoc jus celebrandi ac percipiendi usurpare inciperint: sic ut ad sustinendam huiusmodi rei exceptionem præscriptionis, nihil solidi in his actis inveniat. De mala autem fide, aut saltem defectu tituli, inde constat, quod aliquis alius titulus, quam testamentum prædictum à Reo non proferatur: is autem titulus, quoad Reum seu Curatum Ecclesiæ de Limale nullus sit; quia ut deductum est, titulus legati ex prædicto testamento ad altare S. Antonii, seu ejus Rectorem pertinet, & minime ad Pastorem. Proinde existimo partes Domini Iudicis esse, ut declaret facultatem celebrandi hanc missam, eoque nomine percipiendi quatuor modios, ad Actorem in qualitate, quâ agit pertinere; & Reum ad perceptorum modiorum, saltem ab interrupta hac præscriptione, restitutionem, simul & in expensis litis condemnari.